

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԳՆՈՒՄՆԵՐԻ ՀԵՏ ԿԱՊՎԱԾ
ԲՈՂՈՔՆԵՐ ՔՆՆՈՂ ԱՆՁ**

ՀԱՅՏԱՐԱՐՈՒԹՅՈՒՆ

ԲՈՂՈՔԻ ՆԵՐԿԱՅԱՑՄԱՆ ՎԵՐԱԲԵՐՅԱԼ

Բողոքի ծածկագիրը և ամսաթիվը՝ ԳԲՔԱ-ԼՕ-2019/94, 19.11.2019թ.

Բողոք բերող անձ՝ «Էյջ Զի Էյջ Քոմփանի» ՍՊԸ

Պատվիրատու՝ ՀՀ պաշտպանության նախարարություն

Գնման ընթացակարգի ծածկագիրը՝ «ՀՀ ՊՆ ՆՏԱԴ-ԳՀԱՊՁԲ-20-19/2» գնանշման
հարցում

Գնման առարկան՝ Գետդեզիական գործիքների, նավիգացիոն սարքերի և
աշխատանքային կայանի ձեռքբերում

Բողոքի պահանջը՝ Պարտավորեցնել ՀՀ պաշտպանության նախարարությանը չկայացած
հայտարարելու ՀՀ ՊՆ ՆՏԱԴ-ԳՀԱՊՁԲ-20-19/2 գնանշման հարցման ծածկագրով
ընթացակարգը և փոփոխել տեխնիկական բնութագրերը, համապատասխանեցնել
գնումների մասին ՀՀ օրենսդրության պահանջներին՝ բացառելով չհիմնավորված
սահմանապակումները, որոնք խոչընդոտում են հնարավոր հայտատուների
մասնակցությունը:

ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ՝ Լ. ՕՀԱՆՅԱՆ

ՔԱՐՏՈՒՂԱՐ՝ Լ.ԱՆԱՆԻԿՅԱՆ

Նիստերին կարելի է առցանց հետևել <https://www.e-gov.am/gnumner/> հղումով.

Տեղեկացնում ենք, որ «Գնումների մասին» ՀՀ օրենքի՝

- 50-րդ հոդվածի 10-րդ մասի համաձայն՝ յուրաքանչյուր անձ, որի շահերը խախտվել են կամ կարող են խախտվել բողոքարկման հիմք ծառայած գործողությունների արդյունքում, իրավունք ունի մասնակցելու բողոքարկման ընթացակարգին՝ մինչև բողոքի վերաբերյալ որոշում ընդունելու ժամկետը գնումների հետ կապված բողոքներ քննող անձին ներկայացնելով համանման բողոք: Նույն հոդվածի համաձայն՝ բողոքարկման ընթացակարգին չմասնակցած անձը զրկվում է գնումների հետ կապված բողոքներ քննող անձին համանման բողոք ներկայացնելու իրավունքից,
- 51-րդ հոդվածի 1-ին մասի համաձայն՝ գնումների հետ կապված բողոքներ քննող անձին ներկայացված բողոքն ինքնաբերաբար կասեցնում է գնման գործընթացը՝ նույն օրենքի 50-րդ հոդվածի 9-րդ մասով նախատեսված հայտարարությունը հրապարակվելու օրվանից մինչև բողոքարկման վերաբերյալ ընդունված որոշման՝ տեղեկագրում հրապարակման օրը ներառյալ:

Գնումների հետ կապված բողոքներ քննող անձին
Հասցե՝ Մելիք Աղամյան 1, Երևան քաղ.

Բողոք բերող անձ՝ «Էյջ Ջի Էյջ Քոմփանի» ՍՊԸ
տնօրեն Հ. Հարությունյան
Հասցե՝ Երևան քաղ., Այգեստան 9/69, 55բն.
Էլ. հասցե՝ hgh.company@mail.ru, հեռ. 95-909009

Պատվիրատու՝ ՀՀ պաշտպանության նախարարություն
Հասցե՝ Բագրեւանդի 5, Երևան քաղ.

Գնանշման հարցման ծածկագիր՝ «ՀՀ ՊՆ ՆՏԱԴ-ԳՀԱՊՁԲ-20-19/2»
Գնման առարկան՝ գեոդեզիական գործիքների, նավիգացիոն սարքերի
և աշխատանքային կայանի ձեռքբերում

Բ Ո Ղ Ո Ք

1. Վեճի առարկան.

1.1 Պաշտպանության նախարարության կողմից հայտարարվել է «ՀՀ ՊՆ ՆՏԱԴ-ԳՀԱՊՁԲ-20-19/2» ծածկագրով գնանշման հարցման ընթացակարգ:

1.2 «ՀՀ ՊՆ ՆՏԱԴ-ԳՀԱՊՁԲ-20-19/2» ծածկագրով հրավերը հրապարակվել է 07.11.2019թ.:

1.3 Հայտերը ներկայացնելու վերջնաժամկետը՝ 18.11.2019թ, ժամը՝ 11:30:

1.4 Հայտերի բացման օր է սահմանված 18.11.2019թ, ժամը՝ 11:30:

1.5 «ՀՀ ՊՆ ՆՏԱԴ-ԳՀԱՊՁԲ-20-19/2» ծածկագրով ընթացակարգին մասնակցելու նպատակով «Էյջ Ջի Էյջ Քոմփանի» ՍՊ ընկերությունը (հետայսու՝ Ընկերություն) ուսումնասիրելով հրավերը՝ տեխնիկական բնութագրում արձանագրել է անհամապատասխանություն «Գնումների մասին» ՀՀ օրենքի կարգավորումների հետ և պարզաբանման նպատակով հարցադրում էր ներկայացվել հրավերի տեխնիկական բնութագրի 1-ին և 2-րդ չափաբաժինների վերաբերյալ

1.6 Հարցադրումների վերաբերյալ տրվել են պատասխաններ, որոնք այնուամենայնիվ ըստ էության չեն պարզաբանում տեխնիկական բնութագրերում առկա սահմանափակող չափորոշիչների հիմնավորումները և օրենքով չնախատեսվող պահանջների առկայությունը, որոշ հարցադրումների վերաբերյալ ներկայացված տեսակետներն էլ տարընկալման հիմքեր են ստեղծում:



2.Բողոքի փաստական և իրավական հիմքերը.

«Գնումների մասին» ՀՀ օրենքի (հետայսու՝ Օրենք) 3-րդ հոդվածի 1-ին մասի 2-րդ կետի համաձայն Օրենքի նպատակն է ի թիվս այլի «գնումների և գնումների գործընթացի տեսետող, արդյունավետ և օգտավետ իրականացումը:»

Համաձայն Օրենքի 3-րդ հոդվածի 2-րդ մասի գնումների գործընթացը հիմնվում է հետևյալ սկզբունքների վրա.

1) գնման գործընթացի միասնական կանոններով մրցակցային, թափանցիկ, համաչափ, հրապարակային և ոչ խտրական հիմունքներով կազմակերպում.

2) պայմանագրի կնքման նպատակով մասնակիցների շրջանակի ընդլայնում և նրանց միջև մրցակցության խրախուսում.

3) ցանկացած անձի համար, անկախ նրա օտարերկրյա ֆիզիկական անձ, կազմակերպություն կամ քաղաքացիություն չունեցող անձ լինելու հանգամանքից, գնման գործընթացին մասնակցելու իրավահավասարություն:»:

Համաձայն օրենքի 13-րդ հոդվածի «1. Գնման առարկայի բնութագրերը պետք է ամբողջությամբ և հստակ նկարագրեն ձեռք բերվող ապրանքի, աշխատանքի կամ ծառայության հատկանիշները, դրանց ձևերը, նյութերը և վճարման պայմանները՝ բացառելով տարակերպ մեկնաբանությունը: Գնման առարկայի բնութագրերը, որոնք ներառում են նաև պայմանագրի գինը, ընդգրկվում են պայմանագրում:

2. Գնման առարկայի բնութագրերը՝

1) պետք է մրցակցության հավասար պայմաններ ապահովեն հնարավոր մասնակիցների համար.

2) չպետք է հանգեցնեն գնումների գործընթացում մրցակցության համար չհիմնավորված խոչընդոտների առաջացմանը.

3) պետք է լինեն օբյեկտիվորեն հիմնավորված և համարժեք լինեն այն կարիքին, որի բավարարման նպատակով կատարվում է տվյալ գնումը.

4) ներառում են գնման առարկայի մասնագրի, տեխնիկական տվյալների, իսկ աշխատանքների դեպքում՝ նաև աշխատանքների ծավալաթերթի, ժամանակացույցի և այլ ոչ գնային պայմանների ամբողջական և համարժեք նկարագրությունը:

3. Ելնելով գնման առարկայի առանձնահատկությունից՝ դրանց հատկանիշները հնարավորինս ներառում են ձեռք բերվող ապրանքի, աշխատանքի կամ ծառայության որակին, ստանդարտին, անվտանգությանը, պայմանական նշաններին, տերմինաբանությանը, փաթեթավորմանը, բեռնաթափմանը, չափին, նախագծերին, ինչպես նաև գնման առարկայի այլ հատկանիշներին վերաբերող պայմանների հստակ նկարագրությունը՝ հիմնված միջազգային ստանդարտների և Հայաստանի Հանրապետությունում գործող նորմատիվատեխնիկական փաստաթղթերի, ստանդարտների, իսկ դրանց բացակայության դեպքում՝ ժամանակավոր տեխնիկական պայմանների վրա:

4. *Գնման առարկայի հատկանիշները կարող են սահմանվել նաև որպես կատարողականի կամ գործառության (ֆունկցիոնալ) նկարագրեր, որոնք պետք է ներկայացվեն բավարար ճշտությամբ՝ հնարավորություն տալով մասնակիցներին եւ պատվիրատուին ճշգրիտ ընկալել պայմանագրի առարկան:*

5. *Գնման առարկայի հատկանիշները չպետք է պահանջ կամ հղում պարունակեն որեւէ առեւտրային նշանի, ֆիրմային անվանմանը, արտոնագրին, էսքիզին կամ մոդելին, ծագման երկրին կամ կոնկրետ աղբյուրին կամ արտադրողին, բացառությամբ այն դեպքերի, երբ անհնար է գնման առարկայի բնութագրումն առանց դրանց: Հղումներ օգտագործելու դեպքում հատկանիշների բնութագիրը պետք է պարունակի «կամ համարժեք» բառերը:*

1-ին եւ 2-րդ չափաբաժիններով ներկայացված տեխնիկական բնութագրերի վերաբերյալ հանձնաժողովին ներկայացվել է հարցադրումներ, քանի որ դրանք կազմվել են սահմանափակումներով եւ վերոհիշյալ օրենքի խախտմամբ: Թեեւ պատվիրատուն երկու չափաբաժիններում էլ նշել է, որ «*վերը նշված ցանկում ապրանքները պետք է լինեն նշված ապրանքատեսակի կամ համարժեք*» այնուամենայնիվ պահանջվող ապրանքների տեխնիկական բնութագրերը ներկայացված են այնպիսի պարամետրերով, որոնց հավաքական ամբողջությունը կարող է ապահովել մեկ արտադրողի կողմից արտադրված մեկ ապրանքատեսակ (TRIMBLE, C5՝ Էլեկտրոնային տախեոմետր եւ TRIMBLE R10-2 GPS սարք, TSC 3 կառավարման կոնտրոլլեր): Պատվիրատուն նշելով կամ համարժեք եզրույթը արտաբուստ կարծես թե առաջնորդվել է օրենքի 13-րդ հոդվածով, բայց ներկայացված չափորոշիչները հնարավորություն չեն տալիս համարժեք ապրանքատեսակով մասնակցության հայտ ներկայացնել:

Ներկայացվում են առաջադրված հարցերը եւ պարզաբանումը.

Հարցադրում N 1՝

«Հարգելի՛ հանձնաժողով, ծանոթանալով «ՀՀ ՊՆ ՆՏԱԴ-ԳՀԱՊՁԲ-20-19/2» ծածկագրով հրավերի տեխնիկական բնութագրին եւ դեկավարվելով «Գնումների մասին» ՀՀ օրենքի 29-րդ հոդվածով խնդրում եմ տրամադրել պարզաբանում 1-ին եւ 2-րդ չափաբաժինների վերաբերյալ:

Նշված չափաբաժինների տեխնիկական բնութագրերը ներկայացված են այնպիսի չափորոշիչներով եւ գնային միջակայքով, որ մրցույթին կարող է մասնակցություն ապահովել բացառապես մեկ արտադրող (Trimble) իր մեկ ապրանքատեսակով, քանի որ այլ արտադրողներ չեն ապահովում պահանջված չափորոշիչները՝ հրավերով ներկայացված գնային միջակայքում:

«Գնումների մասին» ՀՀ օրենքի 13-րդ հոդվածի 2-րդ մասը սահմանում է, որ գնման առարկայի բնութագիրը պետք է մրցակցության հավասար պայմաններ ապահովեն

հնարավոր մասնակիցների համար, չպետք է հանգեցնեն գնումների գործընթացում մրցակցության համար չհիմնավորված խոչընդոտների առաջացմանը, պետք է լինեն օբյեկտիվորեն հիմնավորված եւ համարժեք լինեն այն կարիքին, որի բավարարման նպատակով կատարվում է տվյալ գնումը, ներառում են գնման առարկայի մասնագրի, տեխնիկական տվյալների, իսկ աշխատանքների դեպքում՝ նաև աշխատանքների ծավալաբերթի, ժամանակացույցի եւ այլ ոչ գնային պայմանների ամբողջական եւ համարժեք նկարագրությունը:

Նույն հոդվածի 5-րդ մասի համաձայն՝ գնման առարկայի հատկանիշները չպետք է պահանջ կամ հղում պարունակեն որևէ առևտրային նշանի, ֆիրմային անվանանք, արտոնագրին, էքսիզին կամ մոդելին, ծագման երկրին կամ կոնկրետ աղբյուրին կամ արտադրողին, բացառությամբ այն դեպքերի, երբ անհնար է գնման առարկայի բնութագրումն առանց դրանց: Հղումներ օգտագործելու դեպքում հատկանիշների բնութագիրը պետք է պարունակի «կամ համարժեք» բառերը:

- Նախ I-ին չափաբաժնում հստակ նշված է արտադրող ընկերության անվանումը եւ ապրանքի մոդելը, որով խախտվում է վերոգրյալ նորմի պահանջը, օրենքի նպատակը եւ սկզբունքները:

Խնդրում եմ պարզաբանել - արդյո՞ք «առնվազն 700մ առանց անդրադարձյի չափման հնարավորությամբ» պահանջը չի սահմանապակում այլ արտադրող ընկերությունների հնարավոր մասնակցությունը, հավասար մրցակցությունը: Առաջարկվող գնային միջակայքը եւ տեխնիկական չափորոշիչները համապատասխանում են միայն Trimble ապրանքանիշի կողմից արտադրվող Trimble C5 մոդելին: Խնդրում եմ պարզաբանել այս չափանիշի համար արդյո՞ք հնարավոր չէ նշել միջակայք:

Առաջարկ - փոփոխել այդ չափորոշիչը եւ միջակայքն ընդլայնել, օրինակ՝ 500-800 մետր, քանի որ հակառակ դեպքում այլ արտադրողներ նմանատիպ պարամետրերով եւ գնային միջակայքով ապրանքատեսակներ չեն կարող առաջարկել, այդ դեպքում կարձանագրենք, որ հայտարարված մրցույթին կարող է մասնակցել բացառապես Trimble ապրանքատեսակով հայտ ներկայացնողը:

Դիտարկում - նախկին մրցույթներով ՀՀ պաշտպանության նախարարության կողմից ձեռքբերված նմանատիպ սարքերն ունեցել են 500 մետր 700մ առանց անդրադարձյի չափման հնարավորություն եւ այն ընդունելի է եղել:

I-ին չափաբաժնի հետևյալ բնութագրի «երկկողմանի կառավարման էկրաններ, որոնցից առնվազն մեկը՝ սենսորային» վերաբերյալ տրամադրել պարզաբանում՝ արդյո՞ք երկկողմանի կառավարման թվային, բայց՝ ոչ սենսորային էկրանը համարվում է նմանատիպ՝ հաշվի առնելով այն, որ ֆունկցիոնալ առումով այն նույնությամբ կատարում է բոլոր ֆունկցիաները, արձանագրելով՝ ակնկալվող արդյունքը:

➤ 2-րդ չափաբաժնում նույնպես նշված է արտադրող ընկերության անվանումը և սարքանքի մոդելը, որով խախտվում է 13-րդ հոդվածի պահանջը, օրենքի նպատակը և սկզբունքները:

Պարզաբանել - պահանջվող «ոչ պակաս քան. ալիքների քանակը՝ 600» չափորոշիչի փոխարեն, եթե առաջարկվի սարքավորում որն ապահովում է 452 ունիվերսալ ալիք, որոնք մուլտիֆունկցիոնալ են, արդյո՞ք կդիտարկվի նմանատիպ և համարժեք:

Այն, որ տեխնիկական բնութագիրը ներկայացվել է Trimble արտադրողի համար, և ս մեկ անգամ հավաստվում է հետևյալ չափորոշիչով «Texas Instrument Sitara սերիա 3715 ARM Cortex-A8 (800Mհց)» այս սարքի պրոցեսորի մակնիշն իր հսկման սարքերում օգտագործում է միայն Trimble ապրանքնաիշը:

Պարզաբանել - մեր կողմից ներկայացվող սարքավորումն օգտագործում է այլ պրոցեսոր ավելի հզոր պարամետրերով 1 Գիգահերց հզորությամբ, ինչը ապահովում է ավելի հզոր աշխատանք, արդյո՞ք այն կդիտարկվի համարժեք:

Պարզաբանել - «վերալիցքավորվող Li-Ion մարտկոցային բլոկ՝ 11.1Վ, 2600մԱժ, 28.9 ՎՃ» սույն նկարագիրը մարտկոցի համար սահմանափակում է մրցակցությունը, քանի որ այլ արտադրողներ այլ պարամետրերի համադրմամբ կարող են ստանալ նմանատիպ արդյունք, բայց ունենալ ավել կամ պակաս հզորություն՝ հաշվի առնելով հոսանքի էներգիայի ծախսը: Արդյո՞ք ներկայացված չափորոշիչներով սահմանափակումները նպատակ են հետապնդում մեկ արտադրողի մասնակցություն այս մրցույթին:

Պարզաբանել - 2-րդ չափաբաժնով պահանջվող «տեսախցիկ՝ 5 մեգապիկսել, ավտոֆոկուսով, սպիտակ CՃ կրկնակի լուսարձակով կամերա» փոխարեն, եթե առաջարկվում է համարժեք նույն պարամետրերով տեսախցիկը, բայց դեղնավուն լուսարձակի լապսերով և մեկ լուսարձակով, արդյո՞ք կդիտարկվի համարժեք էլնելով այն իրողությունից որ ֆունկցիոնալ կիրառումից ապահովում է նույն ակնկալվող արդյունքը:

Պարզաբանել - նշված է «հասկիչ սարքի վրա ռադիոմոդեմ 2.4 ԳՀց» արդյո՞ք համարժեք կգնահատվի, եթե ռադիոմոդեմը տեղակայված լինի ոչ թե հսկող սարքի վրա, այլ՝ GPS կայանի, կրկին էլնելով այն իրողությունից, որ կիրառման դեպքում ապահովում է նույն արդյունքը, ինչ հսկիչ սարքի վրա տեղակայված լինելու դեպքում:

Պարզաբանել - «աշխատանքի ժամանակը՝ 3ժ», սույն չափորոշիչի անհրաժեշտությունը, չէ որ այն սահմանափակում է այլ արտադրատեսակ մատակարարների մասնակցությունը, քանի որ այդ պահանջը կարող է ապահովել միայն Trimble արտադրողը: Այդ ժամանակահատվածը իրականում չի կրում պրակտիկ կիրառելի բնույթ, քանի որ մասնագետը 34 ժամ դաշտում տվյալ հավաքագրելու ֆիզիկապես հնարավորություն չունի:

Առաջարկում ենք այս չափորոշիչը փոխել՝ նշելով միջակայք, հնարավորություն ընձեռնելով այլ մասնակիցների՝ մրցույթի հայտ ներկայացնելու համար: Օրինակ՝ միջակայք նշել 20-34 ժամ:

1-ին եւ 2-րդ չափաբաժինների բնութագրով նշված է, որ «Անհրաժեշտ է ներկայացնել առաջարկվող ապրանքների արտադրողի (MAF - Manufacturer's Authorization Form) կամ նրա կողմից Հայաստանի Հանրապետությունում լիազորված կազմակերպության (դիստրիբյուտորի) անունից (DAF - Distributer's Authorization Form) նամակ-լիազորագիր»:

Պարզաբանել՝ արդյո՞ք այս սահմանափակումը օրենքի խախտում չէ, քանի որ «Գնումների մասին» ՀՀ օրենքի 13-րդ հոդվածը սահմանում է գնման առարկայի բնութագրերը, որի ուսումնասիրությունից չենք կարող արձանագրել, որ օրենքը պահանջ է ներկայացնում՝ լիազորված կազմակերպության անունից հանդես գալու նախապայման»:

Վերոգրյալ հարցադրումների վերաբերյալ պատվիրատուն ներկայացրել է հետևյալ պարզաբանումը.

1. Համաձայն «Գնումների մասին» ՀՀ Օրենքի 13-րդ հոդվածի 2-դ կետի 3-րդ ենթակետի («գնման առարկայի բնութագրերը պետք է համարժեք լինեն այն կարիքին, որի բավարարման նպատակով կատարվում է տվյալ գնումը»)՝ տեխնիկական բնութագրերում ներկայացված են ՀՀ պաշտպանության նախարարության կարիքների բավարարման համար անհրաժեշտ նվազագույն պարամետրերը՝ չսահմանափակելով համարժեք ես/կամ ավելի բարձր պարամետրերով սարքերի մատակարարման հնարավորությունը: ՊՆ կարիքները տվյալ դեպքում հրապարակայնորեն մեկնաբանման ենթակա չեն, քանի որ պարունակում են պետական և ծառայողական գաղտնիք:

2. Համաձայն «Գնումների մասին» ՀՀ Օրենքի 13-րդ հոդվածի 5-րդ մասի՝ տեխնիկական բնութագրերում որևէ առևտրային նշան կամ ֆիրմային անվանում նշելիս կիրառվել են «կամ համարժեք» բառերը:

3. 1-ին չափաբաժնի տեխնիկական բնութագրում.

ա. «առնվազն 700մ առանց անդրադարձյի չափման հնարավորությամբ» պահանջը հիմնավորված է նախկինում 500մ ցուցանիշով սարքերի կիրառմամբ ի հայտ եկած խնդիրներից խուսափելու անհրաժեշտությամբ: Միաժամանակ նշեմ, որ տախտեմետրերի գրեթե բոլոր ապրանքանիշերի տեսականիների շարքերում առկա են 700մ եւ 700մ-ը գերազանցող ցուցանիշ ունեցող սարքեր,

բ. «երկկողմանի կառավարման էկրաններ, որոնցից առնվազն մեկը՝ սենսորային» պահանջը ներկայացվում է ելնելով աշխատաժամանակի նվազեցման անհրաժեշտությունից՝ սենսորային էկրանի օգտագործումը արագացնում է աշխատանքը:

4. 2-րդ չափաբաժնի տեխնիկական բնութագրում.

ա. «ոչ պակաս քան. ալիքների քանակը՝ 600» պահանջը ներկայացվում է հաշվի առնելով, որ չափման ճշտությունը եւ ազդանշանի ստացման արագությունը ուղիղ համեմատական են օգտագործվող ալիքների քանակին,

բ. «Texas Instrument Sitara սերիա 3715 ARM Cortex-A8 (800Մհց)» պահանջը հանդիսանում է պրոցեսորին վերաբերող նվազագույն պարամետր եւ ցանկացած

համարժեք եւ/կամ Ձեր կողմից նշված 1Գից գերազանցող պրոցեսորը ընդունելի կլինի: Միաժամանակ նշեմ, որ վերը նշված տիպի պրոցեսոր օգտագործվում է առնվազն երկու ապրանքանիշի սարքերի մեջ,

գ. «վերալիցքավորվող Li-Ion մարտկոցային բլոկ՝ 11.1Վ, 2600մԱժ, 28.9 ՎԺ» եւ «տեսախցիկ՝ 5 մեգապիկսել, ավտոֆոկոսով, սպիտակ CՃ կրկնակի լուսարձակով կամերա» պահանջները հանդիսանում են նվազագույն պահանջ և ընդունելի կլինեն դրանց համարժեք եւ/կամ գերազանցող պարամետրերով ցանկացած սարք: Միաժամանակ հայտնում եմ, որ նշված լուսարձակի «սպիտակ» բառը չի սահմանափակում սպիտակ գույնի «սառը սպիտակ» կամ «տաք սպիտակ» ընդունված կիրառման երանգները,

դ. հսկիչ սարքի կազմում «ռադիոժողով 2.4 ԳՀց» ռադիոժողովի առկայության պահանջը ներկայացվել է՝ ՊՆ կարիքների բավարարման նպատակով հսկման սարքը որպես առանձին շարժական սարք այլ սարքերի հետ օգտագործելու անհրաժեշտությունից ելնելով,

ե. «աշխատանքի ժամանակը՝ 34ժ նորմալ պայմաններում, ամբողջական լիցքավորումը՝ 3ժ» նվազագույն պահանջը համապատասխանում է ՊՆ կարիքների բավարարման պահանջներին:

5. ՀՀ ՊՆ ՆՏԱԴ-ԳՀԱՊՁԲ-20-19/2 ծածկագրով գնման ընթացակարգի հրավերով սահմանված MAF կամ DAF նամակ-հավաստագրերի պահանջը տարածվում է պայմանագրի կատարման (մատակարարման) փուլի վրա, հավաստում է ապրանքի որակը: Սարքի հետագա երաշխիքային սպասարկումը (նորոգումը, վերանորոգումը) արտոնագրված մասնագետների (սրահների) կողմից իրականացվում է միայն նամակ-հավաստագրերի առկայության դեպքում:

Միաժամանակ տեղեկացնում եմ, որ որակավորման փուլում պահանջվում է միայն հավաստում՝ մատակարարման փուլում նշված նամակի ներկայացման վերաբերյալ: Մեր կողմից տվյալ պահանջը չի սահմանափակում մատակարարվող ապրանքի ծագման երկիրը կամ արտադրող ընկերությունը: Ցանկացած կազմակերպություն կամ ֆիզիկական անձ, գնելով ապրանքը արտադրողից եւ/կամ ՀՀ-ում լիազորված կազմակերպությունից եւ/կամ այլ երկրներում պաշտոնական ներկայացուցիչներից կարող է ստանալ նշված նամակ-հավաստագրերը:

Նամակ-հավաստագրերի առկայության պահանջը ներկայացվում է ոչ բոլոր դեպքերում, այլ միայն հատուկ նշանակության սարքերի համար:

Այսպիսով, պատվիրատուն պարզաբանման 1-ին կետով հայտնում է, որ «տեխնիկական բնութագրերում ներկայացված են ՀՀ պաշտպանության նախարարության կարիքների բավարարման համար անհրաժեշտ նվազագույն պարամետրերը՝ չսահմանափակելով համարժեք եւ/կամ ավելի բարձր պարամետրերով սարքերի մատակարարման հնարավորությունը»:

Հարց է առաջանում, եթե բնութագրով նշված է հստակ թիվ առանց միջակայք նշելու, ապա պատվիրատուն ինչպես է գնահատում, որ չի սահմանափակում կամ նշում է անպիսի թվային շեմ, որ դիպուկ կարող է ապահովել մեկ արտադրող, որը համարժեք է իր առաջարկած գնային միջակայքի համար, իսկ նշված նվազագույն շեմից բարձր չափորոշիչով ապրանքատեսակը այլ գնային սահման ունի:

Պարզաբանման 3-րդ կետով հայտնում է, որ «500մ ցուցանիշով սարքերի կիրառմամբ ի հայտ եկած խնդիրներից խուսափելու անհրաժեշտությունից են առնվազը 700մ նշվել:»

Ինչ վերաբերում է 500մ ցուցանիշի դեպքում ի հայտ եկած խնդիրներին դա ապացուցման անհրաժեշտություն ունի, իսկ նշելով 700մ դրանով իսկ սահմանափակվ կամ համարժեք ապրանք ներկայացնելու հնարավորությունը: Իսկ այն դիտարկումը, որ տախեոմետրերի գրեթե բոլոր ապրանքանիշերի տեսականիների շարքերում առկա են 700մ-ը գերազանցող ցուցանիշ ունեցող սարքեր, ապա համամիտ ենք առկա են, սակայն պատվիրատուի ներկայացրած գնային տիրույթից ավելի բարձր արժեք ունեն:

Պարզաբանման 3-րդ կետի բ/ ենթակետի, 4-րդ կետի ա/, ո/, ե/ ենթակետերով ներկայացրած մյուս դիտարկումները պարզապես գնահատողական կարծիք են եւ ոչ ավելին, մինչդեռ՝ այդ դիտարկումները պետք է ունենան գիտական ապացուցողական հենք, որպեսզի կասկածի տակ չլինի պետական միջոցներով կազմակերպվող մրցույթի օրինականությունը եւ այն չգնահատվի դիտավորության դրսևորմամբ հնարավոր մասնակիցների համար սահմանափակող:

Պարզաբանման 4-րդ կետի ե/ ենթակետի պատճառաբանությունն, այն որ *«աշխատանքի ժամանակը՝ 34ժ նորմալ պայմաններում, ամբողջական լիցքավորումը՝ 3ժ» նվազագույն պահանջը համապատասխանում է ՊՆ կարիքների բավարարման պահանջներին*, կրկին պատվիրատուի սուբյեկտիվ վերաբերմունքն ու մեկնաբանությունն է, քանի որ աշխատանքի 34 ժամ չափորոշիչ ապահովում է միայն Trimble արտադրողը համապատասխան ապրանքատեսակով:

Ուշագրավ է, որ MAF կամ DAF նամակ-հավաստագրերի պահանջ օրենքը չի նախատեսում, պարզաբանման համար ներկայացված հարցադրման պարագայում հանձնաժողովը չի հիմնավորել, թե այդ նամակ-հավաստագրերի պահանջը ո՞ր նորմով է սահմանված: Ինչ վերաբերում է, որ դրանք ներկայացվելու են մատակարարման փուլում կամ դրանց առկայության պահանջը ներկայցվում է ոչ բոլոր դեպքերում, այլ միայն հատուկ նշանակության սարքերի համար՝ հրավերի ուսումնասիրությունից չենք կարող գտնել հստակ ձևակերպում այդ մասին:

MAF կամ DAF նամակ-հավաստագրերը չեն հավաստում է ապրանքի որակը կամ սարքի հետագա երաշխիքային սպասարկումը:

Պատվիրատուի ներկայացրած տեխնիկական բնութագրերը չեն համապատասխանում օրենքով սահմանված նորմերին եւ հայտատուի համար ստեղծում են ապակողմնորոշող իրավիճակ:

Վիճարկվող հրավերով մասնակցությունն ըստ էության առաջացնում է մրցակցության համար չհիմնավորված խոչընդոտներ:

ՀՀ կառավարության 04.05.2017թ թիվ 526-Ն որոշման 22-րդ կետը սահմանում է, որ «Գնման առարկայի բնութագրերը սահմանելիս պետք է հաշվի առնել, որ դրանց պետք է բավարարեն մեկից ավելի հնարավոր մասնակիցներ և արտադրողներ՝ բացառությամբ գնումը սույն կարգի 23-րդ կետի 4-րդ ենթակետով նախատեսված հիմքով կատարելու դեպքերի:»

Պատվիրատուն օրենքին անհամապատասխան հրավեր ներկայացնելով սահմանափակում է հնարավոր հայտատու մասնակիցներին մասնակցելու հայտարարված գնման ընթացակարգին:

Իրավական նորմերի խախտմամբ կազմված և ներկայացված հրավերը չի կարող ապահովել գնումների այն ընթացակարգը, որը նախատեսել է օրենսդիրը «Գնումների մասին» ՀՀ օրենքով և դրանց իրականացվան համար ընդունված այլ իրավական ակտերով:

3. Պահանջ.

ՀՀ պաշտպանության նախարարությանը պարտավորեցնել չկայացած համարելու «ՀՀ ՊՆ ՆՏԱԴ-ԳՀԱՊՁԲ-20-19/2» գնանշման հարցման ծածկագրով ընթացակարգը և փոփոխել տեխնիկական բնութագրերը, համապատասխանեցնել գնումների մասին ՀՀ օրենսդրության պահանջներին՝ բացառելով չհիմնավորված սահմանափակումները, որոնք խոչընդոտում են հնարավոր հայտատուների մասնակցությունը:

Կից ներկայացվում են.

1. Անձը հաստատող փաստաթղթի պատճեն,
2. բողոք ներկայացնելու համար վճարման անդորրագրի պատճեն:

«Էյջ Ջի Էյջ Քոմփանի» ՍՊԸ
տնօրեն Ն. Հարությունյան



19 նոյեմբերի, 2019թ